

名家集注
孙子兵法

册四



春秋·孙武○著 东汉·曹操 唐·杜牧等○注



解放军出版社

◆ 册四 ◆

名家集注孙子兵法



春秋·孙武○著 汉·曹操 唐·杜牧等○注



印刷工业出版社

图书在版编目(CIP)数据

名家集注孙子兵法 / (春秋) 孙武著, (汉) 曹操, (唐) 杜牧等注. —北京: 印刷工业出版社, 2011.8

ISBN 978-7-5142-0155-0

I. ①名… II. ①孙… ②曹… ③杜… III. ①兵法—中国—春秋时代 ②孙子兵法—注释 IV. ①E892.25

中国版本图书馆 CIP 数据核字 (2011) 第 152602 号

名家集注孙子兵法



出版发行: 印刷工业出版社

(北京市翠微路2号 邮编: 100036)

址: www.keyin.cn pprint.keyin.cn

作:  (www.rzbook.com)

刷: 北京威远印刷厂

本: 七八七毫米×一〇九二毫米 十六开

张: 三十二

数: 二百三十千字

次: 二〇一一年十月第一版 二〇一一年十月第一次印刷

价: 一百九十八圆 (全四册)

第十一章

九地第十一

本文从战略地理学的角度出发，论述在战略进攻中实施突袭的问题。九地主要讲的是在不同的战略地区实施战略进攻时所必须采取的战略行动方针，与《地形篇》里单纯谈『地』有所差别。这里的九地，具体地说，就是将人的因素与地形因素统一起来考虑，从『人』与『地』的互动关系中总结和寻找作战良策。因此孙子强调，要抓住敌人的弱点，争取主动，乘虚而入，迅速进攻。



九地第十一

曹操曰：欲战之地有九。李筌曰：胜敌之地有九，故次《地形》之下。王皙曰：用兵之地，利害有九也。张预曰：用兵之地，其势有九。此论地势，故次《地形》。

孙子曰：用兵之法，有散地^①，有轻地^②，有争地^③，有交地，有衢地，有重地，有圯地，有围地，有死地^④。

曹操曰：此九地之名也。

张预曰：此九地之名。

●诸侯自战其地，为散地。

曹操曰：士卒恋土，道近易散。

李筌曰：卒恃土，怀妻子，急则散，是为散地也。

杜牧曰：士卒近家，进无必死之心，退有归投之处。

杜佑曰：战其境内之地，士卒意不专，有溃散之心，故曰散地。

梅尧臣同杜牧注。

王皙同曹操注。

何氏曰：散地，士卒恃土，怀恋妻子，急则散走，是为散地。一曰：地无关键，士卒易散走；居此地者，不

可数战。又曰：地远四平，更无要害，志意不坚，而易离，故曰散地。吴王问孙武曰：『散地，士卒顾家，不可与战，则必固守不出。若敌攻我小城，掠吾田野，禁吾樵采，塞吾要道，待吾空虚而急来攻，则如之何？』武曰：『敌人深入吾都，多背城邑，士卒以军为家，专志轻斗；吾兵在国，安土怀生，以陈则不坚，以斗则不胜。当集人合众，聚谷蓄帛，保城备险，遣轻兵绝其粮道；彼挑战不得，转输不至，野无所掠，三军困馁，因而诱之，可以有功。若欲野战，则必因势依险设伏，无险则隐于天气阴晦昏雾，出其不意，袭其懈怠，可以有功。』

张预曰：战于境内，士卒顾家，是易散之地也。郢人将伐楚师，楚斗廉曰：『郢人军其郊，必不诚；恃近其城，莫有斗志。』果为楚所败是也。

●入人之地而不深者，为轻地。

曹操曰：士卒皆轻返也。

杜牧曰：师出越境，必焚舟梁，示民无返顾之心。

李筌曰：轻于退也。

梅尧臣曰：入敌未远，道近轻返。

王皙曰：初涉敌境势轻，士未有斗志也。

何氏曰：轻地者，轻于退也。入敌境未深，往返轻易，不可止息，将不得数动劳人。吴王问孙武曰：『吾至轻地，始入敌境，士卒思还，难进易退；未背险阻，三军恐惧；大将欲进，士卒欲退，上下异心。敌守其城垒，整其车骑，或当吾前，或击吾后，则如之何？』武曰：『军至轻地，士卒未专，以入为务，无以战为。故无近其名城，无由其通路，设疑佯惑，示若将去；选骁骑，衔枚先入，掠其牛马六畜。三军见得，进乃不惧。分吾良卒，密有所

伏，敌人若来，击之勿疑；若其不至，舍之而去。』又曰：『军入敌境，敌人固垒不战，士卒思归，欲退且难，谓之轻地。当选骁兵伏要路，我退敌追，来则击之也。』

张预曰：始入敌境，士卒思还，是轻返之地也。尉繚子曰：『征役分军而归，或临战自北，则逃伤甚焉。』言民兵四集，分屯占地，使北来者当北道，则多逃，以其开之耳。

●我得则利，彼得亦利者，为争地。

曹操曰：可以少胜众，弱击强。

李筌曰：此阨喉守险地，先居者胜，是为争地也。

杜牧曰：必争之地，乃险要也。前秦苻坚先遣大将吕光讨西域，坚败绩后，光自西域还，师至宜禾，坚凉州刺史梁熙谋拒之。高昌太守杨翰曰：『吕光新定西国，兵强气锐，其锋不可当。若出流沙，其势难测。高梧谷口险要，宜先守之，而夺其水；彼既困渴，人自然投戈，如以为远不可守，伊吾之关，亦可拒之。若废此二要，难为计矣。地有所必争，真此机也。』熙不从，竟为光所灭也。

陈皞曰：彼我若先得其地者，则可以少胜众，弱胜强也。

杜佑曰：谓山水阨口，有险固之利，两敌所争。

梅尧臣曰：无我无彼，先得则利。

何氏曰：争地，便利之地，先居者胜，是以争之。吴王问孙武曰：『敌若先至，据要保利，简兵练卒，或出或守，以备我奇，则如之何？』武曰：『争地之法，先据为利；敌得其处，慎勿攻之。引而佯走，建旗鸣鼓，趣其所爱，曳柴扬尘，惑其耳目；分吾良卒，密有所伏，敌必出救。人欲我与，人弃我取，此争先之道也。若吾先至，而

敌用此术，则选吾锐卒，固守其所，轻兵追之，分伏险阻，敌人还斗，伏兵旁起，此全胜之道。」

张预曰：险固之利，彼我得之，皆可以少胜众，弱胜强者，是必争之地也。唐太宗以五千人守成皋之险，坐困窦建德十万之众是也。

●我可以往，彼可以来者，为交地。

曹操曰：道正相交错也。

杜牧曰：川广地平，可来可往，足以交战对垒。

陈皞曰：交错是也。言其道路交横，彼我可以来往。如此之地，则须兵士首尾不绝，切宜备之。故下文云：『交地，吾将谨其守。』其义可见也。

杜佑曰：交地有数道往来，交通无可绝。

梅尧臣同陈皞注。

何氏曰：交地，平原交通也。一曰：可以交结，不可杜绝之，绝之致隙。又曰：交通四远，不可遏绝。吴王问孙武曰：『交地，吾将绝敌，使不得来。必令吾边城修其守备，深绝通路，固其隘塞。若不先图之，敌人已备，彼可得而来，吾不得而往，众寡又均，则如之何？』武曰：『既我不可以往，彼可以来，吾分卒匿之，守而易急，示其不能。敌人且至，设伏隐庐，出其不意，可以有功也。』

张预曰：地有数道，往来通达，而不可阻绝者，是交错之地也。

●诸侯之地三属，

曹操曰：我与敌相当，而旁有他国也。

孟氏曰：若郑界于齐、楚、晋是也。

◎先至而得天下之众者，为衢地。

曹操曰：先至得其国助也。

李筌曰：对敌之傍，有一国为之属，先往而通之，得其众也。

杜牧曰：衢地者，三属之地，我须先至其冲，据其形势，结其旁国也。天下，犹言诸侯也。

梅尧臣曰：彼我相当，有旁国三面之会，先至则得诸侯之助也。

王皙曰：曹公云：『先至得其国助。』皙谓先至者，结交先至也。言天下者，谓能广助，则天下可从。

何氏曰：衢地者，地要冲，控带数道，先据此地，众必从之，故得之则安，失之则危也。吴王问孙武曰：『衢地必先。若吾道远发后，虽驰车骤马，至不能先，则如之何？』武曰：『诸侯参属，其道四通，我与敌相当，而旁有他国。所谓先者，必先重币轻使，约和旁国，交亲结恩，兵虽后至，众已属矣。我有众助，彼失其党，诸国犄角，震鼓齐攻，敌人惊恐，莫知所当。』

张预曰：衢者，四通之地。我所敌者，当其一面，而旁有邻国，三面相连属，当往结之，以为己援。先至者，谓先遣使以重币约和旁国也。兵虽后至，已得其国助矣。

◎入人之地深，背城邑多者，为重地。

曹操曰：难返之地。

李筌曰：坚志也。白起攻楚，乐毅伐齐，皆为重地。

杜牧曰：入人之境已深，过人之城已多，津梁皆为所恃，要冲皆为所据，还师返旆，不可得也。

杜佑曰：难返还也。背，去也；『背』与『倍』同。多，道里也。远去已城郭，深入敌地，心专意一，谓之重地也。

梅尧臣曰：乘虚而入，涉地愈深，过城已多，津要绝塞，故曰重难之地。

王皙曰：兵至此者，事势重也。

何氏曰：重地者，入敌已深，国粮难应资给，将士不掠何取？吴王问孙武曰：『吾

引兵深入重地，多所逾越，粮道绝塞，设欲归还，势不可过，欲食于敌，持兵不失，则

如之何？』武曰：『凡居重地，士卒轻勇，转输不通，则掠以继食，下得粟帛，皆贡于

上，多者有赏，士卒无归意。若欲还出，即为戒备，深沟高垒，示敌且久。敌疑通途，

私除要害之道，乃令轻车，衔枚而行，以牛马为饵。敌人若出，鸣鼓随之，阴伏吾士，与之中期，内外相应，其败

可知也。』

张预曰：深涉敌境，多过敌城，士卒心专，无有归志，是难退之地也。司马景王谓诸葛恪卷甲深入，其锋不可

当是也。


行山林、险阻、沮泽，凡难行之道者，为圯地。

曹操曰：少固也。

贾林曰：经水所毁曰圯。沮洳圯地，不得久留，宜速去也。

梅尧臣曰：水所毁圯，行则犹难，况战守乎？

何氏曰：圯地者，少固之地也，不可为城垒沟隍，宜速去之。吴王问孙武曰：『吾入圯地，山川险阻，难从之



北宋·刀车（模型）

道，行久卒劳；敌在吾前，而伏吾后，营在吾左，而守吾右；良车骁骑，要吾隘道，则如之何？」武曰：「先进轻车，去军十里，与敌相候，接期险阻；或分而左，或分而右，大将四观，择空而取，皆会中道，倦而乃止。」

张预曰：险阻、渐洳之地，进退艰难，而无所依。

◎所由入者隘，所从归者迂，彼寡可以击吾之众者，为围地。

李筌曰：举动难也。

杜牧曰：出入艰难，易设奇伏覆胜也。

杜佑曰：所从入阨险，归道远也，持久则粮乏。故敌可以少击吾众者，为围地也。

梅尧臣曰：山川围绕，入则隘，归则迂也。

何氏曰：围地，入则隘险，归则迂回，进退无从，虽众何用？能为奇变，此地可由。吴王问孙武曰：「吾入围地，前有强敌，后有险难，敌绝我粮道，利我走势，敌鼓噪不进，以观吾能，则如之何？」武曰：「围地之宜，必塞其阙，示无所往。则以军为家，万人同心，三军齐力，并炊数日，无见火烟，故为毁乱寡弱之形。敌人见我，备之必轻，则告励士卒，令其奋怒，陈伏良卒，左右险阻，击鼓而出。敌人若当，疾击务突，我则前斗后拓，左右犄角也。」又曰：「敌在吾围，伏而深谋，示我以利，縈我以旗，纷纭若乱，不知所之，奈何？」武曰：「千人操旌，分塞要道，轻兵进挑，陈而勿搏，交而勿去，此败谋之法。」

张预曰：前狭后险之地，一人守之，千人莫向，则以奇伏胜。

◎疾战则存，不疾战则亡者，为死地。

曹操曰：前有高山，后有大水，进则不得，退则有碍。

李筌曰：阻山背水食尽，利速不利缓也。

杜牧曰：卫公李靖曰：『或有进军行师，不因乡导，陷于危败，为敌所制。左谷右山，束马悬车之径，前穷后绝，雁行鱼贯之岩。兵陈未整，而强敌忽临，进无所凭，退无所固，求战不得，自守莫安。驻则日月稽留，动则首尾受敌。野无水草，军乏资粮，马困人疲，智穷力极。一人守隘，万夫莫向。如彼要害，敌先据之，如此之利，我已失守，纵有骁兵利器，亦何以施其用乎？若此死地，疾战则存，不疾战则亡。当须上下同心，并气一力，抽肠溅血，一死于前，因败为功，转祸为福。』此乃是也。

陈皞曰：人在死地，如坐漏船，火烧屋。

贾林曰：左右高山，前后绝涧，外来则易，内出则难，误居此地，速为死战则生。若待士卒气挫，粮储又无而持久，不死何待！

梅尧臣曰：前不得进，后不得退，旁不得走，不得不速战也。

何氏曰：死地力战或生，守隅则死。吴王问孙武曰：『吾师出境，军于敌人之地。敌人大至，围我数重，欲突以出，四塞不通；欲励士激众，使之投命溃围，则如之何？』武曰：『深沟高垒，示为守备；安静勿动，以隐吾能；告令三军，示不得已；杀牛燔车，以飨吾士。烧尽粮食，填夷井灶，割发捐冠，绝去生虑，将无余谋，士有死志。于是砥甲砺刃，并气一力，或攻两旁，震鼓疾噪，敌人亦惧，莫知所当。锐卒分行，疾攻其后，此是失道而求生。故曰：困而不谋者穷，穷而不战者亡。』吴王曰：『若吾围敌，则如之何？』武曰：『山峻谷险，难以逾越，谓之穷寇。击之之法，伏卒隐庐，开其去道，示其走路，求生透出，必无斗意，因而击之，虽众必破。』《兵法》又曰：『若敌人在死地，士卒勇气，欲击之法，顺而勿抗，阴守其利，必开去道，以精骑分塞要路，轻兵进而诱』

之，陈而勿战，败谋之法也。』

张预曰：山川险隘，进退不能，粮绝于中，敌临于外，当此之际，励士决战，而不可缓也。

◎是故散地则无战，

李筌曰：恐走散也。

杜牧曰：已具其上。

贾林曰：地无关阨，卒易散走，居此地者，不可数战。地形之说，一家之理。若号令严明，士卒爱服，死且不顾，何散之有？

梅尧臣曰：我兵在国，安土怀生，陈则不坚，斗则不胜，是不可以战也。

王皙曰：决于战则惧散。

张预曰：士卒怀生，不可轻战。吴王问孙武曰：『散地不可战，则必固守不出。若敌攻我小城，掠吾田野，禁吾樵采，塞吾要道，待吾空虚而来急攻，则如之何？』武曰：『敌人深入，专志轻斗，吾兵安土，陈则不坚，战则不胜；当集人聚谷，保城备险，轻兵绝其粮道。彼挑战不得，转输不至，野无所掠，三军困馁，因而诱之，可以有功。若欲野战，则必因势依险设伏，无险则隐于阴晦，出其不意，袭其懈怠。』

◎轻地则无止，

李筌曰：恐逃。

杜牧曰：兵法之所谓轻地者，出军行师，始入敌境，未背险要，士卒思还，难进易退，以入为难，故曰轻地也。当必选精骑，密有所伏，敌人卒至，击之勿疑，若是不至，逾之速去。

杜佑曰：志未坚，不可遇敌。

梅尧臣曰：始入敌境，未背险阻，士心不专，无以战为。勿近名城，勿由通路，以速进为利。

王皙曰：无故，不当止也。

张预曰：士卒轻返，不可辄留。吴王曰：『士卒思还，难进易退，未背险阻，三军恐惧，则如之何？』武曰：『军在轻地，士卒未专以入为务，无以战为。故无近其名城，无由其通路，设疑佯惑，示若将去。乃选精骑，衔枚先入，掠其六畜，三军见得，进乃不惧。分吾良卒，密有所伏，敌人若来，击之勿疑；若其不至，舍之而去。』

争地则无攻⁷

曹操曰：不当攻，当先至为利也。

李筌曰：敌先居地险，不可攻。

杜牧曰：无攻者，言敌若已得其地，则不可攻。

梅尧臣曰：形胜之地，先据乎利。敌若已得其处，则不可攻。

张预曰：不当攻而争之，当后发先至也。吴王曰：『敌若先至，据要保利，简兵练卒，或出或守，以备我奇，则如之何？』武曰：『争地之法，让之者得，求之者失。敌得其处，慎勿攻之，引而佯走，建旗鸣鼓，趣其所爱，曳柴扬尘，惑其耳目；分吾良卒，密有所伏，敌必出救。人欲我与，人弃我取，此争先之道也。若吾先至，而敌用此术，则选吾锐卒，固守其所，轻兵追之，分伏险阻，敌人还斗，伏兵旁起，此全胜之道也。』

交地则无绝⁸

曹操曰：相及属也。

李筌曰：不可绝间也。

杜牧曰：川广地平，四面交战，须车骑部伍首尾联属，不可使之断绝，恐敌人因而乘我。

贾林曰：可以交结，不可杜绝，绝之致隙。

杜佑曰：相及属也。俱可进退，不可以兵绝之。

梅尧臣曰：道既错通，恐其邀截，当令部伍相及，不可断也。

王皙曰：利粮道也。交相往来之地，亦谓之通地。居高阳以待敌，宜无绝粮道。

张预曰：往来交通，不可以兵阻绝其路，当以奇伏胜也。吴王曰：『交地吾将绝敌，使不得来。必令吾边城修其守备，深绝通道，固其隘塞。若不先图之，敌人已备，彼可得而来，吾不得而往，众寡又均，则如之何？』武曰：『既我不可以往，彼可以来，则分卒匿之，守而易怠，示其不能，敌人且至，设伏隐庐，出其不意。』

○衢地则合交，

曹操曰：结诸侯也。

李筌曰：结行也。

杜牧曰：诸侯，即上文云旁国也。

孟氏曰：得交则安，失交则危也。

梅尧臣曰：地虽四通，何以得天下之助？当以重币合。

王皙曰：四通之境，非交援不强。

张预曰：四通之地，先交结旁国也。吴王曰：『衢地贵先。若吾道远而发后，虽驰车骤马，至不得先，则如之

何？』武曰：『诸侯参属，其道四通，我与敌相当，而旁有他国。所谓先者，必重币轻使，约和旁国，交亲结恩，兵虽后至，众已属矣。简兵练卒，阻利而处，我有众助，彼失其党，诸国犄角，敌人莫当。』

重地则掠，

曹操曰：畜积粮食也。

李筌曰：深入敌境，不可非义，失人心也。汉高祖入秦，无犯妇女，无取宝货，得人心如此。筌以『掠』字为『无掠』字。

杜牧曰：言居于重地，进未有利，退复不得，则须运粮为持久之计，以伺敌也。

孟氏曰：因粮于敌也。

梅尧臣曰：去国既远，多背城邑，粮道必绝，则掠畜积以继食。

王皙曰：深入敌境，则掠其饶野，以丰储也。难地，食少则危。

张预曰：深入敌境，馈饷不继，当励士掠食，以备其乏也。吴王曰：『重地多逾城邑，粮道绝塞，设欲归还，势不可过，则如之何？』武曰：『凡居重地，士卒轻勇，转输不通，则掠以继食，下得粟帛，皆贡于上，多者有赏。若欲还出，深沟高垒，示敌且久，敌疑通途，私除要害，乃令轻车，衔枚而行，扬其尘埃，饵以牛马。敌人若出，鸣鼓随之，阴伏吾士，与之中期，内外相应，其败可知。』

圯地则行，

曹操曰：无稽留也。

李筌曰：不可为沟隍，宜急去之。